



UNIVERSITÄTS-
BIBLIOTHEK
PADERBORN

Arbor Vitæ Sive Vita Et Doctrina Christi

Ex Quatuor Evangeliiis In Meditationes Quotidianas Velvti Totidem Ramos
Distributa

Illsung, Jakob

Dilingæ, 1693

Meditatio CCXLVII. Christus prædicat in Monte.

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)

dicatum) ac ingens Beneficium non tantum præ Septuaginta duobus, sed præ innumeris alijs tibi collatum, per comparisonem cum Vita Apostolica gratus agnosce, & summi æstima, simulque omnem curam & solitudinem adhibe, ne aut Vocatione Divina excidas, aut illi non satisfacias; quem timorem incutere poterit exemplum Judæ, ab Evangelistis tam unanimiter propositum.

PUNCT. III. Considera monita specialia, recens electis Apostolis à Christo tradita apud S. Matthæum hic c. 10. *Nolite possidere aurum, neque argentum, neque pecuniam in Zonis vestris. v. 9. Non peram in via, neque duas tunicas, neque calceamenta, neque virgam. v. 10. Ecce ego mitto vos, sicut oves in medio luporum. Estote ergo prudentes, sicut serpentes, & simplices, sicut columbæ. v. 16. Et eritis odio omnibus hominibus propter Nomen meum: qui autem perseveraverit usque in finem, hic salvus erit. v. 22. Non est discipulus supra Magistrum, nec servus supra Dominum suum. v. 24. Qui non accipit Crucem suam, & sequitur me, non est me dignus. v. 38. Qui invenit Animam suam, perdet illam, & qui perdiderit Animam suam propter me, inveniet eam. v. 39.*

MEDITATIO CCXLVII.

Christus predicat in Monte.

Luc. 6. v. 17. Matth. 5. v. 1.

PUNCTUM I. Postquam Christus in monte Galilææ, ab urbe Capharnaò versus occidentem tribus milliaribus Italicis distante, nec procul à mari, urbèque Bethsaida dissito, duodecim Apostolos elegerat:

De:

Descendens cum illis, stetit in loco campestri, & turba Discipulorum ejus, & multitudo copiosa plebis ab omni Judæa, & Jerusalem, & maritimâ (regione) & Tyri, & Sidonis, qui venerant, ut audirent eum, & sanarentur à languoribus suis. Et qui vexabantur à Spiritibus immundiis, curabantur. Et omnis turba quærebat eum tangere; quia Virtus de illo exibat, & sanabat omnes. Luc. 6. à v. 17.

Ex Christi pernoctatione in Oratione, & descensu de monte ad Populum, in loco campestri congregatum cognoscimus, prius conscendendum esse montem Contemplationis, & Elevationis mentis ad DEUM per Orationem, deinde ad functiones vitæ activæ, & ad curam Salutis alienæ descendendum esse: sic enim homines sanabimus à languoribus suis, si prius (ut Christus apud S. Lucam c. 24. v. 50. Discipulis dixit) induamur Virtute ex Alto; sic, si qua ante in nobis præexistat Virtus, de nobis exibat, & sanabat omnes, & quidem absque discrimine, ut æqualiter apud omnes valeamus, & omnes æqualiter apud nos valeant &c. neque potestas, neque voluntas omnes sanandi nobis desit.

PUNCT. II. Imitandum tibi etiam propone Populum, qui non solum venit ad Christum, ut audiret eum, sed etiam, ut sanaretur à languoribus suis: iste enim fructus ex auditu & accessu ad Christum per Orationem, Meditationem, lectionem Spiritualem, auditionem Verbi Divini, Sacram Communionem, & Sacramentorum usum &c. referendus est: ideo non solum omnes audiebant eum, sed etiam quærebat eum tangere: Sanitas enim Animæ non solo auditu obtinetur, sed necesse est, proximè ad Christum accedere, & manu, sive exercitatione operis ad eum pertingere.

pertingere. Sic Virtus de illo exhibit, & sanabit te à languoribus tuis, si eum attentè audias, sanitatem Animæ avidè intendas, & Imitatione operis, velut manu attingas.

PUNCT. II. Postquam Christus in loco campestri Populo se tangendum præbuerat, ut ægris sanitatem impertiretur, rursus ipse cum Discipulis eò saltem usque ascendit in montem, unde à populo conspicui & audiri commodè poterat: Matth. c. 5. v. 1. *Videns autem JESVS turbas, ascendit in montem, & cum sedisset, accesserunt ad eum Discipuli ejus, & aperiens os suum, docebat eos.* Addit S. Lucas c. 6. v. 20. *Et ipse elevatis oculis in Discipulos suos dicebat: Beati &c.* His verbis quatuor Actiones Christi memorantur. Ascensio in montem, Sessio, Apertio oris, Elevatio oculorum in Discipulos, sedenti adstantes. Prima denotat sublimitatem Virtutis Christi, quæ facit, ut verba docentis attentius, ac melius audiantur, & Exempla spectabilia fructuosius respiciantur. Itaque & tu docturus alios, ut melius audiaris, ac videaris, cum Christo ascende in montem Perfectionis. Secunda denotat Quietem animi maximè curandam, quam Cælestis Doctrina in docente supponit, & in audiente parit. Tertia designat Certitudinem Doctrinæ, utpote ore Filij DEI prolata. Quarta insinuat præcipui Auditoris Designationem, quòd nempe Discipuli Christi, & eorum Sectatores sibi, tanquam capacioribus, potissimum factas putent octo Beatitudinum promissiones; & proinde hi præ alijs hominibus sibi eas comparare contendant.